

SAN JUAN KARTA NYAFXTEWE'SX

Ītxi kaafx'i'ze'jwa'jsa vxyaani

¹ Nyafxitey ūsyā'kh yu' txā'sna kaajiyu'jna fxi'jaçthu i'kwe'sxtxi. Kwe'sxa' iiwēse'tha'w sa' kwe'sx yafxju yuu iuuytha'w. Ī'neeçxáa uymée, kwe'sx kusejuwa iijxa'dxtha'w Dxus Nçxi'k ĩtxi kaafx'i'ze'jwa'jsa's. ² Ītxi kaafx'i'ze'jwa'jsa' vxyaak, aça' uyçxa' txāa vxyaani's kwe'sxa' pta'sxi'tha'w. Txāasatha'w āçxha' i'kwe'sxtxiwa kaajiyu'ju', багаçxte yuhwa pçumée ĩtxi kaafx'i'ze'jwa'jsa Ney yakh ūssa kwe'sxtxi vxyaapa'ga. ³ Kwe'sx wēse'jçxa yafxjuwa uyni's āate pta'sxiçtha'w, i'kwe'sxwa kwe'sx yakh utxaaçxa fxi'zekahn, kwe'sxwa ma'wētka'w Dxus kwe'sx Tata yakh vxite' Nçxi'k Jesukristo yakh utxaaçxa fxi'ze' txā'wēy. ⁴ Txā'wētha'w kaajiyu'jna fxi'ja', i'kwe'sxwa weçxana fxi'zewa'ja's ji'phukah.

Dxusa' eena'sa'

⁵ Jesukristo na'wēk kaapiya'j txā'sna i'kwe'sxtxi pta'sxiçtha'w: Dxusa' eena'sa'. Txāa pa'ga txajx tasxte' kīh yuhwa çxhi'dxsa meea' jī'k. ⁶ Aça' maawa Dxus yakh fxi'zena ūsthu jīçxawa, Dxus jxkaahni's nwēese'jmée çxhi'dxte fxi'zeçxa', ĩsxiisa yuuna. ⁷ Nawa Dxuswa ma'wē eena'te ūsna txā'wēy kwe'sxwa eena'te fxi'zete', kwe'sx pwe'sx puutx puiimée

zhiçxkwe fxi'zewa'j kasejena, aça' Dxus Nçxi'k Jesukristo eea' kwe'sx pkaltxi jxuka khukhuna.

⁸ Txã'jïte', kïh pkal yuhwa ji'phmeetha'w jïwá'nja'w na' peekíçxáa ya'ïsxiiisa yu'nja'w.

⁹ Nawa txã'wë yajkxmée, pkalsayuhth sũhna Dxusa's perdon pëyi'nja'w aça' txã'wë yũusa's kim yuhnawa wa'lmée jxuka kxtey peltunãycça ewmeesa's jxuka nuyaateena. ¹⁰ Txã'jïte' kïh yuhwa ewmée yũusameetha'w jï'nja'w na' Dxus we'weçxa': Ewmeesata' jïçxa' ïsxiiija'k jïsa yu'nja'w.

2

Dxus tasxte kwe'sx ju'gu we'we pu'çxsa' Kristo'

¹ Adx luuçxwe'sx, pkalte fxi'zekahmenthu pta'sxna fxi'ja'. Txã'wëtewa maai' yu' pkalte wetewá'kwe nawa Dxus tasxte kwe'sx ju'gu we'we pu'çxsa ji'ptha'w, txã' Jesukristo' isasa yu's jxuka kxtey yuusáa. ² Jesukristok kwe'sx pkal pa'gate vxite' naa kiwete nasa jxukaysa pkal pa'gate yã'jçxa ya'dukhçxa uu.

³ Dxus jxkaahnitxi's kxtey yuuna fxi'zeçxa yuuçxáa Dxusa's jiiyuhth sũhwa'ja's ya'ji'phuna.

⁴ Nawa maai' yu' Dxusa's jiith jïwáana nawa tx-ajx jxkaahnitx kxtey nwëese'jsame' txã' ïsxiiisa yuuna. ⁵ Maawa Dxus jxkaahnitx kxtey nwëese'jena txã' Dxus peeygãani's ùuste jxuka ji'phsaçxa txã'wë yuuna. Txã'wë yuuçxáa Dxus yakh fxi'zena ùsne'tka'w sũhwa'ja's ya'ji'phuna.

⁶ Dxus yakh fxi'zena ùsthu jïsa', Jesukristo na'wëy kïh pkal yuhwa ji'phmée fxi'zena.

Dxus jxkaahni u'sesa

⁷ Adx peeygãanisawe'sx, i'kwe'sxtxi' Dxus jxkaahni u'sesa pta'sxna fxi'jaçmeeth, Dxus jxkaahni nyafxíi pta'sxte iiwēse'jyã'ji'kwe txãaíçxá'. ⁸ Txã'wēçxawa na'wē nyafxíi jxkaahni's kaayaki'jna fxi'jaçthu txã' u'sesa na'wē yuh kaseje'k. Txajíçxáa i'kwe'sxa' Kristo's ũusuh jxuka peeygãhçxa', i'kwe'sx pwe'sxwa txã'wēy yūuna fxi'zeçi'kwe. Txãa pa'ga açxha' skhēuuça' jxpubana çxhi'dxte fxi'zenisa', aça' jxpubamée fxi'zeni eena'sa vxyaaça'.

⁹ Maaí' jxpubamée eena'te ũsthu jĩçxawa txajx yakthē'ja's açena, txã' jxpubana çxhi'dxte fxi'zesaçxa txã'wē yuuna. ¹⁰ Jxpubamée eena'te fxi'zesa' txajx yakthē'ja's ahçemée peeygãhna fxi'zena, kīh yuhwa pkalte kweete'jwa'j yu'sa' vxitmée. ¹¹ Nawa txajx yakthē'ja's ahçena fxi'zesa' çxhi'dxte uyya' ājamée mtee pa'jwa'ja's yuuwa jīmée jxpubana fxi'zesaçxa txã'wē yuuna.

¹² Adx luuçxwe'sx, i'kwe'sx pkala' peltunãynitx yuu Jesukristo uute', txãa pa'gath fxi'ja'. ¹³ Txã'wēy thē'jsawe'sx, i'kwe'sxa' na'wē nyafxíi entey Jesukristo' ũsyã'kh yu' txã'sna jiyupa'gath fxi'ja'. Sa' piçtakxwe'sx, eçxthē'ja's knayi'kwe txãa pa'gath fxi'ja'.

Adx luuçxwe'sx, Dxusa's jiyui'kwe txãa pa'gath fxi'ja'. ¹⁴ Thē'jsawe'sx, na'wē nyafxíi entey Jesukristo' ũsyã'kh yu' txã'sna jiyupa'gath fxi'ja'. Sa' piçtakxwe'sx, Dxus pta'sxni's ũuste yu'akhçxa eçxthē'ja's ũukhmée knayi'kwe txãa pa'gath fxi'ja'.

¹⁵ Açxha' kxazsay mpa'yajkxwe, naa kiwetewe'sxa's yajkxya'mée. Maawa naa ki-

wetewe'sxa's yaakxsa' Dxusa's yaakxsameeçxa txã'wẽ yuuna. ¹⁶ Txãa pa'gatey naa kiwete' na'wẽ yaakxnisaçxáa ũsta': naa kakwe' kazx yũuna fxi'zeni, yafxju uyçxa kazx ũus yaakxni, kĩhwa ji'phçxa' iiwejçx iiwejçx yajkxna fxi'zenisaçxáa ũsta'. Txã'wẽ ewmeesa yuuçxá'sku naa kiwe' ũsu', aça' txã'wẽsa' Dxus jxthãasnisame'. ¹⁷ Naa kiwete txã'wẽ yũuwa'jçxáana yajkxna fxi'zesa' jxuka pçuwa'jsata' petx naa kiwe yã'jçxa. Nawa Dxus jxthãasniçxá's kxtey yuusa', bagaçxte yuhwa pçumée ãtxi fxi'zewa'ja's ji'phutxna.

Dxus Espiritu' kaajiyu'ju'k maa ãsxiinisatewa, txã'wẽy maa isasatewa

¹⁸ Adx luuçxwe'sx, ãçxha' nmeh en ãjk. I'kwe'sxa' iiwẽse'jne'kwe Kristo's açesa pa'jana jĩni's. Txãasa ãçxha' wala kuh ũsta' Kristo's açesa. Txãa pa'gatha'w jiyu' nmeh en yuuçtewa. ¹⁹ Txãawe'sxa' kwe'sx yakh ũswa'jsamée ne'ta yu', txãasatx kwe'sx ksxavxyuh kaseh. Kwe'sx yakh ũswa'jsawaça', txuteewa'jmée ne'ta yu'. Jxukay yu' kwe'sx yakh fxi'zewa'jsameetxna, txãasatx txã'wẽ txutee.

²⁰ Nawa i'kwe'sxa' Dxus Espiritu's ũuste ji'phi'kwe, txãasa maa isasatewa txã'sa' jx-pubawa'jsamée i'kwe. ²¹ I'kwe'sxa' isasa's jx-pubawa'jsamée i'kwe naa pa'gaiçxáath fxi'ja', peekx jii i'kwe ãsxiinisa' bagaçxte yuhwa isa kaseje'çme'.

²² ¿Kim txã'wẽ ãsxiisa yuukx? Jesusa' Dxus kaahnisame' jĩna we'wesa txã'wẽ ãsxiisa yuuna. Txã'wẽ we'wesa' Dxus Nçxi'knawa jxpa'gamée

yã'jçxa', Neynawa jxpa'gasameeçxa txã'wẽ yuuna. ²³ Maawa Dxus Nçxi'ka's açesa', Neynawa açesa yuuna. Nawa Dxus Nçxi'ka's jxpa'gasa', Neynawa jxpa'gasa yuuna.

²⁴ Txajii nyafxii pta'sxni Dxus yuwe isasa's i'kwe'sx ùuste ew mjxaawwe. Txã'wẽ yũuçxa' Dxus Nçxi'k yakh txutemée fxi'zene'kwe, sa' Ney yakhwa txã'wẽy txutesamée yuune'kwe. ²⁵ Aça' txã'wẽ yũusatxi' Jesukristo' peesya' neeyũuk bagaçxte yuhwa pçumée itxi fxi'zewa'ja's.

²⁶ I'kwe'stxxi maawa kaypuba'jwe'sxteth pta'sxi' jxpa'yakxkahn. ²⁷ Nawa i'kwe'sxa' Dxus Espiritu's ùuste ji'phi'kwe na' maa ãxiinisana aç'a vxite' maa isasatewa thëymée jiyune'kwe, txãa pa'gatey Dxus Espiritu' kãhtewa jxukak kaajiyu'ju', sa' txajx kaapiya'jni' ãxiinisameeta'. Txã'wẽ jiyuçxa', Kristo yakh txutemée fxi'zene'kwe.

²⁸ Adx luuçxwe'sx, açxha' Kristo yakh txutemée mfxi'zewe. Txã'wẽ fxi'zeçxa', thaamemée weçxana jxpa'ga'nja'w Kristo' naa kiwete kãhçxa vxyaatewa. ²⁹ I'kwe'sxa' jiiyã'ji'kwe Jesukristo' kãhtewa jxuka ew yũusaatewa, aç'a maawa txãa na'wẽy kãhtewa jxuka ew yũuna fxi'zeçxa', Dxus luuçxçxa txã'wẽ yuuna.

3

Kwe'sxa' Dxus luuçx yã'tha'w

¹ Dxus peeygãani' seena' yuh wala' txã'sna miijajxwe. Txã'wẽçxaíik adx luuçxwe'sx jina kxsusu' kwe'stxxi'. Aça' kwe'sxa' txajx luuçx

yuhtha'w. Txãa pa'gatx naa kiwetewe'sxa' kwe'sxtxi' jiyu'çmée, Dxusa's jiimeeta' naa pa'ga. ² Adx peeygãanisawe'sx, kwe'sxa' Dxus luuçx yã'tha'w. Nawa Kristo kĩhte', ma'wē seena' zhiçxkwe neeyũuwa'jsa ne'tka'w txãa yu'sa' ũus yajkxçxa kpajkxya' yu' aja'çmeetha'w. Nawa Jesukristo vxyaate', txãa ma'wēsate' weh yuhwa fxiymée txãa na'wēy neeyũuwa'j yu'sa' jiitha'w. ³ Aça' maawa txãa na'wēy yuu wēesa' pkal ji'phmée fxi'zena, Jesukristowa ma'wē kĩh pkal yuhwa ji'phmeesana txã'wēy.

⁴ Maawa pkalte fxi'zesa' Dxus jxkaahnitx nwēese'jmée ũsçxa txã'wē yuuna, aça' Dxus jxkaahnitx kxtey yuumée ũsni' pkal i'çxá'. ⁵ I'kwe'sxa' jii i'kwe Jesukristo' kwe'sx pkaltxi txuhdeya'k naa kiwete kĩh, nawa txãa yu' kĩh pkal yuhwa ji'phmeesak yu'. ⁶ Txãa pa'ga maawa Jesukristo yakh fxi'zesa' pkalte fxi'ze'çme'. Aça' maawa pkalte fxi'zesa' Jesukristo's iuymeena, sa' txãa ma'wēsatewa jiimeesaçxa txã'wē yuuna. ⁷ Adx luuçxwe'sx, mpa'yajkxwe, i'kwe'sxtxi maawa kaypuba'jwe'sxte. Jesukristo na'wēy ew yũuna fxi'zesa yuuçxáa, ewsa yuuna. ⁸ Nawa pkalte fxi'zesa' eçxthē'j yakh ũssaçxa txã'wē yuuna, txãa pa'gatey eçxthē'ja' nyafxiitey pkalsak yu'. Txajjiçxáak Dxus Nçxi'ka' eçxthē'j mjĩini's ivxiituya' kĩh naa kiwete.

⁹ Dxus luuçxa' maa yuhwa pkalte fxi'ze'çmeeta', txãa pa'gatey txãawe'sx ũusa's Dxus yu'ptheçxa nvxiitnisata' naa pa'ga. Txãasa pkalte fxi'zewa'jsameeta' Dxus luuçx yã'ja'. ¹⁰ Txãa pa'gak ya'jiyu' maa Dxus

luuçxtewa. Sa' maa txã'wẽ eçxthê'j luuçxtiwa ya'jiyu'k: Maawa ewmeeçxáa yũuna txajx yakthê'jwe'sxtxi ahçena fxi'zesa' txãawe'sxa' Dxus luuçx meeta'.

Teeçsa na'wẽçxah puutx ya'peeygãhna fxi'zewa'ja'

¹¹ I'kwe'sxa' Kristo kaapiya'jni's iiwẽse'jne'kwe txã' na'wẽk yu': Teeçsa na'wẽçxah puutx ya'peeygãhnak fxi'zewa'j yu'. ¹² Eçxthê'j yakh ũssa Kaina' txajx nyakha's ikhku, nawa kwe'sxa' txãa na'wẽy yuuwa'jsameetha'w. ¿Kĩh yuutega ikh wakx? Kain mjĩini' ewmeek yu', aça' nyakh mjĩini' ewsak yu' txãa pa'ga yuuçxáak ikh.

¹³ Adx yakthê'jwe'sx, kuh yaakxnuwe naa kiwetewe'sx ahçetewa. ¹⁴ Txãa pa'gatey kwe'sxa' vxituwa'ju kasehçxa bagaçxte yuhwa pçumée ĩtxi fxi'zewa'the pa'jsatha'w, txãasa íçxáatha'w yakthê'jwe'sxtxi peeygãja'. Nawa maawa txajx yakthê'ja's peeygãasame', txãa vxituwa'ju kasehsameeçxa txã'wẽ yuuna. ¹⁵ Maawa txãawe'sx yakthê'jwe'sxtxi ahçena fxi'zesa', nasa's ikhsa na'wẽysa íçxá'. Aça' i'kwe'sxa' jii i'kwe nasaa ikhsa' kim yuhwa pçumée ĩtxi fxi'zewa'ja's ji'phumeetxna. ¹⁶ Jesukristo' kwe'sxtxi peeygãhçxa nwe'weya' txajx ĩtxi fxi'zeni's ivxiituk. Txãa txã'wẽ peeygãani yaase'. Aça' kwe'sxwa txã'wẽy kwe'sx yakthê'jtx peeygãhçxa kwe'sx ĩtxi fxi'zeni's ivxiituwa'j ji'ptha'w. ¹⁷ Nawa kwe'sx yakthê'j peejiina ũste uyçxawa kĩhçxáawa iijxtxuhdemeçxa', ¿ma'wẽ Dxus peeygãani's kwe'sx ũste ji'ptha'w

jīya' ājakxtha'w? ¹⁸ Adx luuçxwe'sx, kwe'sx peeygāani' yuwejuçxáa peeygāa we'wewa'jme'. Isa peeygājaçça', āate kaavxya'ja'jwa'ja' kīhçxáawa pu'çxna.

Kwe'sx ũuste ewçxáa ũusutheçxa', Dxus dxi'pte jxpubamée ũste txã'wě yuuna

¹⁹ Txã'wě yūuçxa', isa Dxus luuçxçxa txã'wě yu'nja'w, sa' Dxus dxi'ptewa jxpubamée ũsne'tka'w sūhwa'ja's jī'phu'nja'w. ²⁰ Nawa kīhteçxáawa jxpubaaçte', kwe'sx ũusçxáa yuhwa kaayaki'jī'k aça' Dxusa' kwe'sx ũuste jxthaakwe ew jiisa' aça' txajx dxi'pte īsxiiya' ājame'nja'w. ²¹ Adx peeygāanisawe'sx, kwe'sx ũuste ewçxáa ũusuthena aça' Dxusa' pasuna sūhçxa ²² Dxusa's pēyi'nja'w aça' txã' jxuka ũsuna txajx jxkaahnitx nwēese'jçxa Dxus jxthāasni's kxtey yuuna fxi'zesatxi'. ²³ Dxusa' na'wě yūuwa'ja'sku jxkaaja': txajx Nçxi'k Jesukristo's ũuste jxpa'gaçça, teeçxsa na'wěçxah puutx ya'peeygāhnaak fxi'zekaah. ²⁴ Dxus jxkaahnitx nwēese'jsa' Dxus yakh fxi'zesa yuuna, aça' Dxuswa txãawe'sx yakh fxi'zena. Dxusa' kwe'sxtxi txajx Espiritu's peesku, txāa pa'ga kwe'sxa' jiitha'w Dxusa' kwe'sx yakh ũswa'jsatewa.

4

Dxus Espiritu's jī'phsa vxite' Kristo's açewa'j espiritu's jī'phsa

¹ Adx peeygāanisawe'sx mpa'yajkxwe, txã'wě Dxus Espiritu's jī'ptha'w jīsaxi' txã'wě yuhtxna sūhmée mfxi'zewe. Txã'jīsaxi' ew jiyuwa'ja'

Dxus Espiritu's ũuste ji'phdxihtewa jiyuya'. Txã'wēme' naa kiwete iiméh wala penaçta' Dxus yuwe pta'sxsatha'w jīna ĩsxiina u'jusa. ² Na'jīsaçxáa Dxus Espiritu's ũuste ji'phsa yu-una: Dxus Nçxi'k Jesukristo' kwe'sx na'wēy nasaa yuuçxak vxyaa jīsa yuuçxáa isa we'wesa yuuna. ³ Aça' Jesusa' kwe'sx na'wēy nasaa yuuçxak vxyaa jīsame', txã' Dxus Espiritu's ũuste ji'phmeena, wejxwa Kristo's açesa yu-una. I'kwe'sxa' iiwēse'jne'kwe txã'jīna we'wesa pa'jatxna jīni's. Txãasa ũsyã'tha' naa kiwete.

⁴ Adx peeygāanisawe'sx, i'kwe'sxa' Dxus luuçxi'kwe, txāasai'kwe ĩsxiisatxi' knay, txāa pa'gatey Dxus Espiritu i'kwe'sx ũuste ũssa' thaakwe çxhãçxhasa' naa kiwete ĩsxiisawe'sx ũuste ũssameeçxa'. ⁵ Txāa ĩsxiisa' naa kiwetewe'sxta'. Txã'wēçxaíitx naa kiwetewe'sxçxáana pta'sxi', aça' nasa naa kiwetewe'sxa' nwēese'je'tx. ⁶ Nawa kwe'sxa' Dxus luuçxtha'w, aça' maawa Dxusna jīisa' kwe'sx pta'sxni's nwēese'je'tx. Nawa Dxus luuçxmeesa', kwe'sx pta'sxni's nwēese'je'çmeeta'. Kxah kwe'sxa' jiyu'nja'w kim Dxus Espiritu's isa ũuste ji'phtewa, txã'wēy kim kaypuba'jsatewa.

Peeygāanisa' Dxus tasxuh yuja'

⁷ Adx peeygāanisawe'sx, puutx ya'peeygāhna fxi'zewa'j ji'ptha'w, txāa pa'gatey peeygāhna fxi'zewa'ja's Dxusku pees naa pa'ga. Aça' maawa peeygāhna fxi'zesa' Dxus luuçxta' Dxusa's ji-isa. ⁸ Dxusa' peeygāasa', aça' peeygāawa'ja's

ji'phmeesa' Dxusa's jiimeesaçxa txã'wẽ yu-
una. ⁹ Dxusa' kwe'sxtxi peeygãani's ãate
kaavxya'ja'kh txajx Nçxi'k teeçxçxáasanawa
naa kiwete kaahçxa, txãa nwe'wete' pçumée
ĩtxi fxi'zewa'ja's kwe'sx ji'phukah. ¹⁰ Na'wẽ
yũunisaçxáa peeygãani' yaase': Kwe'sxa' Dxusa's
açesatewa, txãa yu' kwe'sxtxi peeygãhçxak
txajx Nçxi'k makwe teeçxçxáasatewa kwe'sx
pkalpa'gate uuwa'jsa vxitçxa kaah.

¹¹ Adx peeygãanisawe'sx, Dxusa' txã'wẽ
kwe'sxtxi peeygãhte', kwe'sxwa txã'wẽy puutx
ya'peeygãhna fxi'zewa'j ji'ptha'w. ¹² Kim yuhwa
Dxusa's uysa yu' meetxna. Nawa kwe'sxa'
puutx ya'peeygãhna fxi'ze'nja'w aça' txã'wẽ
yũute', Dxusa' kwe'sx ũuste nes yuuna, aç
yuuçxáa kwe'sxwa txãa na'wẽy ew peeygãasa
yu'nja'w. ¹³ Kwe'sxa' Dxus yakh nes yuute',
txãawa txã'wẽy kwe'sx ũuste nesku yu', txãa
pa'gaiçxáak txajx Espiritu's kwe'sx ũuste
nvxiht. ¹⁴ Kwe'sxa' iuytha'w Dxusa' txajx
Nçxi'ka's kaakh naa kiwete nasatx nwe'wekahn,
txãasatha'w kwe'sxa' ãate pta'sxi'. ¹⁵ Maawa
Jesusa' Dxus Nçxi'ka' jĩna we'wesa' txã' Dxus
yakh ũssaçxa txã'jĩna, aça' Dxuswa txajx ũuste
nes yuuna.

¹⁶ Æçha' jiyutha'w Dxusa' kwe'sxtxi txakwe
wala peeygãani's. Dxusa' peeygãasa', aça'
maawa peeygãhna fxi'zesa', Dxus yakh
fxi'zesa yuuna, aça' Dxuswa txãa yakh nes
yuuna. ¹⁷ Txajuk kwe'sx peeygãawa'ja's isa
jxukate ya'ji'phuna ya'pa'ja'. Txã'wẽ yũunijũ'
kastigãywa'j ente' ũukhme'nja'w, txãa pa'gatey

naa kiwete kwe'sxa' Jesukristo na'wēy peeygāasa yu'nja'w naa pa'ga. ¹⁸ Dxus txakwe wala peeygāasa's ¿ma'wē ũukhwa'j yuukx? txāa pa'gatey txajx peeygāanisa' kwe'sx ũukhni's jxuka ivxiitu'k. Aça' ũukhsa' kastigāywa'jne'tka sũhçxa ũukhuna, sa' txā'wē yaakksa' kwe'sxtxi Dxus txakwe wala peeygāani's açxa ew jiimeeçxa txā'wē ũukhuna.

¹⁹ Dxus khuē'yku kwe'sxtxi peeygāh, txāa pa'gatha'w āçxha' kwe'sxwa Dxusa's peeygāja'. ²⁰ Maawa Dxusa's peeygāja'th jĩçxawa yakthē'ja's ahçena fxi'zesa', ĩsxiisa yuuna. Peekx yakthē'j uyna fxi'zenisa's ahçeçxa', ¿ma'wē yũuçxa Dxus uynimeesa's peeygājxa' ājakx? ²¹ Dxusa' na'wēk jxkaaja': Dxusa's peeygājaççxa', txā'wēy peekx yakthē'jnawa peeygāawa'ja' jĩ'k.

5

Dxus luuçxa' ewmeesa's nwēese'jmée jxuka knayu'tx

¹ Maawa Jesusa' Dxus tasxu yuusa Kristona sũhnaçxāa ũuste yaakksa', Dxus luuççxa txā'wē yaakina. Dxusnawa peeygājaççxa', Dxus luuçxtxiwa peeygāhna fxi'zewa'ja'. ² Dxusa's peeygāhna txajx jxkaahnitxi' nwēese'jçxa', Dxus luuçxtxiwa peeygāasaçxa txā'wē yu'nja'w. ³ Dxusna peeygāani txā'wē txajx jxkaahnitx nwēese'jnisa'. Txajx jxkaahni' jxthaakwe yu' thēysameeta'. ⁴ Maawa Dxus luuçxa' naa kiwete ewmeesa's nwēese'jmée jxuka knayu'tx. Jesukristo's ũusuh jxuka yaakxpaga

yuuçxáak naa kiwete ewmeesa's ya'knayu'.
⁵ Maawa Jesusa' Dvus Nçxi'kna sũhna ũusuh
 jxuka yaakxa yuuçxáa, naa kiwete ewmeesa's
 nwēese'jmée knayuutxna.

Jesukristo' Dvus nçxi'ktewa kaajiyu'jsa' naata'

⁶ Jesukristo naa kiwete kũisa' Dvus Nçxi'ktewa
 kaajiyu'jsa' naata': Yu'te bautisãyni vxite'
 kluuste uuni. Nawa yu'te bautisãynijũçxáa yu'
 açxaméek ew ya'jiyu', naasáa kluuste uuniisa
 yakh txãa e'z jwedsa yakh yuuçxáak isa ew
 ya'jiyu' Dvus Nçxi'ktewa. Txã'sa' Dvus Espirituk
 txã'jĩ'. Txajx we'weni' isasata'.
⁷ Jesukristo'
 Dvus Nçxi'ktewa jiisa cielute' tekhta': Dvusa',
 vxite' Jesukristo iũçxá', vxite' Dvus Espiritu'.
 Aça' txãa tekhsa' txãa na'wēçxaçxáatx we'we'.
⁸ Txã'wēy Jesukristo' Dvus Nçxi'ktewa jiisa
 naa kiwete' tekhta': Dvus Espiritu, vxite' yu'te
 bautisãynisa vxite' kluuste uuniisa. Aça'
 txãa tekhsa' txãa na'wēçxaçxáatx we'we'.
⁹ Piçthē'jwe'sx pta'sxniçxáa yuhnawa isa yuh
 we'wene' sũhnatha'w jxpa'ga'. Aça' Dvus
 we'weni yu' wejx jxthaakwe isasa yuhna sũhna
 jxpa'gawa'j ji'ptha'w, txãa pa'gatey Dvus yuuk
 we'weçxa': Jesukristo' Adx Nçxi'ka' jĩ' naa pa'ga.
¹⁰ Jesukristo' Dvus Nçxi'ka' sũhna fxi'zesa', Dvus
 Nçxi'ka's ũuste jxpa'gasaçxa txã'wē yaakina.
 Nawa Dvus we'weçxa': Jesukristo' Adx Nçxi'ka'
 jĩni's maawa jxpa'gasame', Dvusa' ixsiija'k jĩsa
 yuuna, txã'wē Dvusa' isane' we'we' sũhmeçxa.
¹¹ Jesukristo' Dvus Nçxi'ka' jĩna we'weçxa',
 Dvusa' kwe'sxtxi' pçumée iłtxi fxi'zewa'ja's
 peesku jĩnisa', txãa yuuçxáa pçumée iłtxi

fxi'zewa'ja's ji'phsa' naa pa'ga. ¹² Txãa pa'ga maawa Dxus Nçxi'ka's ũuste jxpa'gasa', pçumée ïtxi fxi'zewa'ja's ji'phsa yuutxna. Nawa Dxus Nçxi'ka's ũuste jxpa'gasame', pçumée ïtxi fxi'zewa'ja's ji'phmeesa yuutxna.

Pkal perdon ji'phmeesawa ũsta'

¹³ Dxus Nçxi'ka's ũuste jxpa'gasa', pçumée ïtxi fxi'zewa'ja's ji'phne'tka'w sũhna jiyukahn-thu i'kwe'sxtxi pta'sxna fxi'ja'. ¹⁴ Aça' txã'wẽ yaakxsatxi' Dxusa' pasu'k txajx jxthãasniçxá's pxthaa we'wena pẽjxte' txã'sa' ew jiitha'w. ¹⁵ Kwe'sx pxthaa we'weni's Dxusa' wẽse'jna ũstewa ma'wẽ ew jiiitka'w txã'wẽy kwe'sx pẽyni's jxpa'gawa'ja'swa ew jiitha'w.

¹⁶ Yakthẽ'j pkalte fxi'zena ũstewa txãa pkala' perdon ji'phte uyçxa', maawa Dxusa's neewe'wewa'ja' txãa pkalsa pa'gate, aça' yakthẽ'j txã'wẽ fxi'zesa's Dxusa' ïtxi fxi'zewa'ja's peesuna. Nawa pkal perdon ji'phmeesa ũsta' txã'wẽsate fxi'zena ũste yu', Dxusa's neewe'wewa'ja's jxkaja'çmeeth. ¹⁷ Kihwa ewmée yũuni' pkalçxaçxáata', nawa perdon ji'phta'.

¹⁸ Kwe'sxa' jiitha'w maawa Dxus luuçx yã'ja' peena yu' pkalte fxi'ze'çme'. Txã'wẽ yũuwe'sxte Dxus Nçxi'ka' txajx kusetek jxaawu' eçxthẽ'j suwkahmén. Txãa pa'gak pkalte fxi'ze'çmée.

¹⁹ Kwe'sxa' Dxus luuçx yuhtha'w, nawa naa kiwete nasa jxukaysa Dxusna yajxkmée fxi'zesa' eçxthẽ'j kusetewe'sxta' txã'sa' jiitha'w.

²⁰ Jiitha'w Dxus Nçxi'k naa kiwete kũhçxa', Dxus ïtxisa's jiyuwa'ja's kwe'sxtxi ũsku. Txãa

pa'ga Dxus ãtxisa Nçxi'k Jesukristo yakh fxi'zena ãstha'w. Txãa Dxus ãtxisa' bagaçxte yuhwa pçumée ãtxi fxi'zewa'ja's kwe'sxtxi peessa'.
²¹ Adx luuçxwe'sx, mpa'yajkxwe dxusmeeçá's yaakxni's.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

06da09f4-8d0f-5001-ae8c-0e6aa0131ffd